

Kinnek ouni Kroun

Szen 1: Zäitreess – Dien ale Kinnek gött begruewen **TRACK 1**

Ahh dir léif Leit, léif Kanner, elo maache mir eis op d'Reess! Mir maachen eis op d'Reess an een anert Land, an eng aner Zäit. An diem Land gin et Ritter an Draachen, Kinneken an Spillmänner. An diem Land gött et keng Gesetzer an nëmmen dien, dien ganz fest u sech a seng Iddie gleeft, kann et zu eppes brengen. Déi Zäit, an déi mire lo reesen ass schonns laang eriwwer, d'Buerger, op dienen d'Leit aus dier Zäit gewunnt hunn si scho längst verfall a just nach Ruinen erënneren u si. Mee deemools, an dier Zäit wéi eng Buerg nach Sécherheet an eng Kroun nach Muecht bedeit huet, deemools huet am Räich vun Donnerbuerg e mächtege Kinnek gelieft. A wéi dien enges Daags gestuerven ass, war d'Zäit komm fir säi Jong, de Michel vun Donnerbuerg. An et ass dem Michel vun Donnerbuerg seng onheemlech, spannend, spektakulär, ungleeflech an onvirstellbar Geschicht, déi mir Iech elo verziele wäerten. Dofir setzt Iech schéi brav an Äer Sëtzer, halt den Otem, spëtzt är Ouren un a lauschtert gutt no, wéi et dem Michel, diem Jonken an daperen Kinnek, viru méi wéi 500 Joer ergaangen ass. Viru méi wéi 500 Joer am däischeren, kalen a geheimnisvollen Mëttelalter!

Szen 2: Dien ale Kinnek ass doud, laang soll die neie Kinnek liewen.

Ermesinde: Elo ass et un dir, mäi klenge Michel vun Donnerbuerg. Däi Papp war ee grouse Kinnek, mee hien ass elo doud! Gëschter hu mir e begruewen.

All: Dien ale Kinnek ass doud, laang soll die neie Kinnek liewen.

Robert: Ech, den dapere Ritter Robert vu Rappdéckel schwierem eisem neie Kinnek, dem Michel vun Donnerbuerg, hiem éiweg trei zur Säit ze stoen. Dofir stinn ech an dofir hunn ech mäi Schwäert.

All: Dien ale Kinnek ass doud, laang soll die neie Kinnek liewen.

Franz: Ech, den dapere Ritter Franz vu Fatzbeidel wäert dofir suergen, dass eisem neie Kinnek Michel vun Donnerbuerg keen Hoer gekrëmmt gött. Dofir stinn ech an dofir hunn ech mäi Schwäert.

All: Dien ale Kinnek ass doud, laang soll die neie Kinnek liewen.

Mars: Ech, den dapere Ritter Mars vum Panzerbiërg schwieren dir hei beim Baart vu mengem Papp, datt ech jidderee platt maachen, dien dir, oh mäi Kinnek Michel vun Donnerbuerg wëllt eppes zu leeds doen. Dofir stinn ech an dofir hunn ech mäi Schwäert.

All: Dien ale Kinnek ass doud, laang soll die neie Kinnek liewen.

Pol: *schléift a gött vun dienen anere Ritter erwäecht* An ech, de verschlofenen ... , den dapere Ritter Pol vu Siweschléifer schwieren dir, oh du mäi Kinnek Michel vun Donnerbuerg, ni méi ze verschlofen ..., ni méi déi dräi verschloen an hannerhälteg, niddeträchtteg a verlügen Reiber Donnerbéchs, Pefferkär an Huesefouss un dech erun ze loossen. Wann ech nieft dir stinn, kanns du däi Kapp a Rou leeën! Gudde Nuecht!

All: Dien ale Kinnek ass doud, laang soll die neie Kinnek liewen.

Bauer: Ech de Bauer Knupperduller ...

Schmad: ... an ech de Schmad Eisenhammer ...

Metzler: ... an ech de Metzler Beenhacker ...

Spillmann: ... an ech de Spillmann Tirlittitti ...

Heeschemann: ... an ech den Heeschemann Péiter Séileg ...

All: Dien ale Kinnek ass doud, laang soll die neie Kinnek liewen.

Déi dräi Reiber: ... a mir, déi dräi Reiber ...

Donnerbéchs: ... Donnerbéchs ...

Pefferkär: ... Pefferkär ...

Huese fouss: ... an Huese fouss ...

D' Buergjofferen: ... a mir, déi dräi Buergjofferen ...

Zefania: ... Zefania ...

Oswaldina: ... Oswaldina ...

Genovefia: ... Genovefia ...

All: Dien ale Kinnek ass doud, laang soll die neie Kinnek liewen.

Alicia: ... a schliesslech ech, deng trei Dingerin, d'Alicia, ehemoolg Prinzessin vu Blätzhausen ...

All: ... mir all maachen dech, Pränz Michel, zu eisem neie Kinnek Michel den 1. vun Donnerbuerg.

Ermesinde: An dofir, oh du mäi Jong a mäi Kinnek, solls du alles kréien, wat dengem Papp gehéiert huet: d'Schlass vun Donnerbuerg, eis Ritterbuerg an däin Heeméichshaus, wëll si weist, wéi staark de Kinnek ass ...

All: Déi schéinste Buerg vun der Welt!

Ermesinde: ... dem Kinnek seng Kroun a seng Kleeder, wëll si weisen wéi dichteg de Kinnek ass ...

All: Déi schéinste Kroun an déi schéinste Kleeder vun der Welt!

Ermesinde: ... dem Kinnek säi Ritterschatz, wëll die weist wéi räich de Kinnek ass ...

All: Die schéinste Schatz vun der Welt!

Ermesinde: ... dem Kinnek säi Land, seng Lännereien, wëll si weisen, datt de Kinnek wierklech e Kinnek ass ...

All: Déi schéinste Lännereien vun der Welt!

Ermesinde: ... dem Kinnek seng Ënnerdoen, seng Dinger a Kämpfer, seng Handwierker a Baueren, wëll si weisen wéi mächtig de Kinnek ass ...

All: Déi schéinste Leit vun der Welt!

Ermesinde: Vun elo un bass du eise Kinnek, Michel vun Donnerbuerg a mir follegen dir!

All: Dien ale Kinnek ass doud, laang soll die neie Kinnek liewen.

Michel: Ma da soll et esou sinn! Vun iech meng léif Mamm, vun iech meng daper Ritter a vun iech meng trei Ënnerdoen hunn ech alles kritt, wat ech brauch fir Äere Kinnek ze sinn: eng zolitt Buerg, wonnerschéi Kleeder, e kostbare Schatz, trei Ënnerdoen an e rieseggrousst Räich. Ech wäert all dat éieren a iech all e gudde Kinnek sinn.

All: Dien ale Kinnek ass doud, laang soll die neie Kinnek liewen.

TRACK 2

All gi se vun der Bühn a freeën sech, just d'Ritter bleiwen....

Szen 3: Dien huet dat net verdingt!

Robert: Die Schnuddler! Nach kee Fanger gerouert, a schonns Kinnek!

Franz: Emol nach keen Turnéier gewonn, a schonns Kinnek!

Mars: Emol nach keng Schluecht geschloen, a schonns Kinnek!

Pol: Emol nach, nach, ... net ausgeschlof, a schonns Kinnek!... Ei, elo halen ech emol en Tëmmchen, gudde Nuecht!

Robert, Franz a Mars: Emol nach näischt opweises, a schonns pennt hien an!

Mars: Soll ech en erwächen?

Franz: Looss dat léiwer sinn, dat kënnt emol geféierlech ginn.

Robert: Die Michel vun Donnerbuerg mécht jo nach an d'Box, an ass schonns Kinnek. Dat kann ech net akzeptéieren.

Franz: Die Michel vun Donnerbuerg spillt nach mat de Poppen, an ass schonns Kinnek. Domatt kann ech net d'accord sinn.

Mars: Die Michel vun Donnerbuerg kritt nach d'Fläsch, an ass schonns Kinnek. Domatt kann ech net averstane sinn.

Pol: Schnaarch, schnaarch...

De Mars wëllt de Pol erwächen...

Franz zum Mars: Looss en! Ech soen der et!

Robert: Mir müssen eppes ënnerhuelen!

Franz: Mir kënnen do net nokucken!

Mars: Ech schloen hie mat der Fauscht widder de Kapp!

Robert: Et misst een hien an en Hannerhalt lackelen...

Franz: Et mist een hien vun hannen zesummebannen...

Mars: ... an da ging hien heemlech verschwannen...

Robert: ... kee Mësch ging hie méi fannen...

Mars: Oder et misst een hie vergëften...

Franz: ... mat schlechte Gasen säin Zëmmer lëften...

Robert: ... Angscht a Panik bei him stëften...

Mars: ... hien zerschneiden a paaken a Këschten...

Franz: ... a säi Graf mat faulen Tomate rëschten!

Robert: Dat wir gutt!

Franz: Da wiere mir e lass!

Mars: Diem Schuddeler!

Robert: Passt emol op!

Franz: Jo...?

Mars: Jo... ?

Pol: Jo...? *erwächt*

Robert: Ech hunn d'Léisung: mar, wann d'Sonn opgeet, da komme mir eragestiermt an da so mir un de Grenze vun eisem Räich, wéier die groussen Baatzekapp...

Pol: Die wat?

Franz: Die schreckleche Baatzekapp, dien terribelen, grausamen, brutalen Draach...

Szen 4: De Plang vun de Ritter **TRACK 3**

Huelt Äär Flënten an huelt är Pistoulen
Vergiesst net d'Schwärter an och net d'Kanounen
Séier op de Wee léiwer haut wéi muer
Well mir soen: et geet elo duer

Huelt är Seeler an huelt är Strécklen
Vergiesst net d'Fisselen an och net d'Benglen
Séier op de Wee léiwer haut wéi muer
Well mir soen: et geet elo duer

Eraus aus dem Haus eraus aus der Scheier
Gleeft et eis, dat do gött dech eng deier
Michel vun Donnerbuerg et dauert net méi laang
Dat sätz du – an der Fal
Gi vun der Bühn

Szen 5: Die schrecklechen Draach Baatzekapp

Ermesinde: Elo, wou mäi Jong, de Michel vun Donnerbuerg hei am Räich vun diene vun Donnerbuerg Kinnek ass, elo wäert endlech Rou a Fridden an eist Land akéieren. Nodeems mäi verstuerwene Mann, die wonnerbare Kinnek Waldemar, ..., mat all eise Nopeschlänner Fridde geschloss huet, wäert elo déi Zäit ugoen, wou mir all zefridden a frou kënnen a Freed a Rou hei zu Donnerbuerg liewen.

Déi 4 Rittere kommen eran.

Robert: Kinnigin Ermesinde...

Franz: Kinnek Michel...

Mars: All dir Haffleit...

Pol: an Haffjofferen...

Michel: Roueg, mir hunn elo grad beschloss, datt mir Awunner aus dem Räich vun Donnerbuerg vun elo u wëllen a Rou liewen, ouni Stress an Opreegung, ouni Sträit a Krich. Dofir huet mäi Papp, de Kinnek Waldemar, Fridde mat eise Nopeschräicher gemaach an dofir hunn ech als äre Kinnek dës wonnerbar Ritterbuerg, dës wäertvoll Kroun an dëst kostbaart Gezäi, dësen deieren Ritterschatz, all dës trei Ënnerdoen a Lännereien an den Titel vun engem mächtege Kinnek vun Donnerbuerg kritt.

Franz: Kinnek et ass dat hei...

Michel: Ënnerbriecht mech net! Mir wëllen elo endlech eis Rou!

Mars: Ma da lauschtert emol no!

Michel: Ass et dann elo bal roueg.

Robert: De Baatzekapp...

All: De Baatzekapp!!!!

Robert: De Baatzekapp ass ënnerwee!

Michel: De Baatzekapp ass ënnerwee!

Ermesinde: Die schrecklechen, fiirchterlechen Draach!?

Mars: Mir hunn e gesinn, wéi mir an der Nuecht laanscht eis Grenze geridde sinn. Hien ass ënnerwee heihinner.

Michel: Wat huet e wëlles, die schrecklechen Draach.

Pol: Wat hunn Draache scho wëlles!

Fränz: Alles verbrennen...

Pol: Alles futti maachen...

Robert: Alles doud maachen...

Mars: De Kinnek friessen.

Michel: Ech hat ëmmer gemengt, dee Baatzekapp ging et guer net ginn. Dien hätten d'Leit just erfond, fir hie Kanner Anscht ze maachen. Fir hir Kanner ze erféieren, datt se solle besser follegen a besser léieren.

Mars, Robert, Pol a Fränz: Mir hunn e gesinn!

Handwierker: Die schrecklechen Draach!

Hexen: Die schrecklechen Draach!

Mars, Robert, Pol a Fränz: Mir hunn e gesinn!

Buergjofferen: Iwwerall Feier huet e gemaach!

Hexen: Die schrecklechen Draach!

Mars, Robert, Pol a Fränz: En ass ennerwee!

Handwierker: Also gött et en dach!

Mars, Robert, Pol a Fränz: En ass ennerwee!

Buergjofferen: Duerch de Bësch kënt e geschlach!

Handwierker: Hie wëll eis all friessen.

Buergjofferen: Kee wäert e vergiessen!

Handwierker: Eis Staat brennt e nidder.

Buergjofferen: Klaut all eis Gidder.

Handwierker: A brécht all eis Glidder.

Hexen: Die schrecklechen Draach!

Handwierker a Buergjoffren: Kinnek Michel du muss eppes man, soss kraazt hien aus eis An, zerstéiert eist Hab a Gutt, oder ... hues du iere kee Mutt?!

Michel: Mut? Mut, wat ass dat, ech si nach ze jong fir dat ze wëssen.

Mars: Ech sot et jo, hien huet nach keng Schluecht geschlo.

Michel: De Baatzekapp ass ennerwee, wat soll ech man?

Fränz: Huet nach keen Turnéier bestridden an ass nach mat kengem Päerd geridden.

Michel: Dofir sinn ech nach ze jong! Muss ech elo kämpfen? Muss ech elo streiden, reiden, fechten a boxen. Ech sinn dach Kinnek a net Ritter.

Ermeside: D'Legend seet, datt just een dapere Kinnek die schecklechen Draach Baatzekapp meeschter gött...

Hexen: Die schrecklechen Draach!

Ritter: Kee Ritter...

Bauer: A kee Bauer...

Metzeler: A kee Metzeler...

Schmad: A kee Schmad...

Spillmann: A kee Spillmann...

Heeschemann: An esou guer keen Heeschemann...

Buergjofferen: An och keng Buerjoffer.

Mars: Et muss de Kinnek sinn.

Robert: De Kinnek a soss keen!

All: De Kinnek a soss keen!

Michel: De Kinnek a soss keen?

Pol: Ma dann ass jo alles kloer. Äddi Michel, maach et gutt!

Fränz: Mir sinn da von elo un d'Hären hei op der Buerg...

Robert: Bis du vläicht eng Kéier ... eremkënns.

Mars: Vläicht, iewer nëmme vläicht. Deng Buerg kriss du erem, wann s du géint den Draach gewonn hues!

Pol: Bis elo huet iewer nach ni ee gewonn géint de Baatzekapp, den Draach.

Hexen: Die schrecklechen Draach!

Ritter: Addi Michel maach et gutt.

Michel: Jo, Äddi. Mee, wou ass dien Draach dann? Wou fannen ech en?
Wou muss ech hin?

Robert: Mir hunn e bei de Quelle vum Sambesi gesinn.

Fränz: Um Fouss vum Himmalaya.

Pol: Hanner der Wüst Negev.

Mars: Um Enn vun der Welt!

All: Cool, do wëlle mir mat hinn, do gëtt et bestëmmt eppes ze gesinn!

All man se sech op de Wee just d'Ritter an d'Ermesinde bleiwen zréck.

Robert: Dat leeft jo wéi geschmiert!

Mars: D'Ritterbuerg ass elo eis!

Pol: An d'Kroun an d'Kleeder,

Fränz: An de Ritterschatz,

Robert: An d'Ennerdoen an d'Lännereie kréie mir och nach!

Ermesinde: Freet iech net ze fréi, wëll mäi Michel ass zéi.

Mars: Gewass, gewass, al Kinnigin, elo ass et eriwwer mat dengem Jong.

Robert: Allez, séier, elo huele mir eis d'Kroun.

Fränz: An all dat kostbart Gezei.

Pol: Dat war dien éischte Streech, ... an elo sinn ech midd!

Mars, Fränz, Robert: Mee et war nach net die leschten!

Szen 6: Am Bësch

Ënnerwee

TRACK 4

Alicia: Michel, ech hu kee gutt Gevill.

Michel: Alicia, du bass eng Dingerin, wat solls du schonns wëssen?

Alicia: Mäi Papp ass die berühmte Ritter Schokobolski vu Blätzhausen.

Michel: D'Räich vu Blätzhause gëtt e scho laang net méi. Dat war fréier. De Kinnek Schokobolski vu Blätzhausen ass op ee Kräizzug op Jerusalem gaangen a koum ni méi erem. D'Nopeschräicher hu säi Land ënnert sech opgedeelt. Blätzhausen gëtt et net méi an de Kinnek Schokobolski ass bestëmmt viru Jerusalem gefall.

Alicia: Ech kann dat net gleewen.

Michel: Alicia, et ass iewer esou. Du bass elo meng Dingerin. Soss wiers du jo d'Prinzessin vu Blätzhausen.

Alicia: Ech wees, datt et net wouer ass, an ech spieren, datt mäi Papp nach lieft.

All: Mir si midd.

Handwierker: Wéi wäit ass et nach?

Michel: Ech wees et net.

Heeschemann: Kinnek ouni Buerg, wat wees du eigentlech?

Michel: Ech wees, datt die schrecklechen Draach Baatzekapp bei de Quelle vum Sambesi, um Fouss vum Himalaya, hannert der Wüst Negev um Enn vun der Welt op mech waart. Dat wees ech.

Metzler: A wat wees du nach?

Michel: An datt ech hie muss embréngen, fir Meeschter a mengem Räich ze bleiwen.

Bauer: A wat nach?

Michel: Ech wees nach, datt mir elo mussen duerch dësen däischtere Bësch.

Elo dauchen déi véier Ritter verkleed op.

Robert: Net esou séier.

Pol: Mir sinn d'Meeschteren hei am Bësch!

Fränz: An ouni Erlabnis kënt keen hei derduerch.

Mars: An du schonns guer net.

Michel: Ma da passt emol op.

Alicia: Ech kennen déi véier dach...

TRACK 5

Et kënt zu engem Kampf, dien de Michel ëmmer nees verléiert.

Bummbumm Zack

1 De Michel ass die beschten, gréiste, schéinsten – hie gëtt déi Reiber Meeschter, dat wësse mir all

Hien huet stark Musk'len, haart wéi Eisen – ass hie fäerdeg, ass de Ritter gefall

Allez, allez Michel – Allez, allez Michel

1 - 2 - 3 - 4

Hien ass, hien ass KO

2 id.

3 id.

4 De Michel ass die beschten, gréiste, schéinsten – mee elo ass gie ganz midd omei

Hien huet seng Äerm wéi, Fréiss wéi a nach méi – hien ass lo dätsch, dat ass net an der Rei

Omei, omei Michel – Omei, omei Michel

1 - 2 - 3 - 4

Hien ass, hien ass KO

Mars: Gesäis du, du Méckentarzan, du kënns hei net duerch.

Fränz: Mir si méi staark wéi s du!

Michel: Ech muss iewer duerch! Wëll ech muss den Draach Baatzekapp Meeschter ginn.

Pol: Wien? Den Draach Baatzekapp. Ma du gëss eis emol net Meeschter, wéi wëlls du dann die schrecklechen Draach Meeschter ginn?

All: Ma du gëss si emol net Meeschter, wéi wëlls du dann die schrecklechen Draach Meeschter ginn?

Michel: Ech muss duerch!

Robert: Da muss du bezuelen!

Michel: Bezuelen?

Robert: Jo, Zoll muss du da bezuelen.

Michel: Ech muss Zoll bezuelen, fir duerch de Bësch?

Pol: Genee, du bass e gescheite Borscht! Fir dech a fir deng Leit kascht den Zoll just eng Kinnekskroun a Kinnekskleeder.

Fränz: Dat ass net ze deier.

Mars: Dat ass bal geschenkt.

Michel: Ma ech kann iech dach net meng Kinnekskroun ginn.

Pol: Da bleift dir hei.

Michel: A meng wäertvoll Kinnekskleeder.

Mars: Da geet et nees Heem.

Michel: Heem? Ech hu keen Heem méi. Ech hunn meng Ritterbuerg meng véier Ritter iwverlooss an ech hunn d'Gevill, wéi wann ech déi net esou séier eremkréich.

Robert: Ma mir hunn dat Gevill och!

Pol: Komesch, net!?

All: Allez, Michel, géff deng Kroun, soss geet et net weider.

Michel: Ech ka meng Kinnekskroun dach net einfach esou ewegginn.

All: Da maach elo endlech.

Michel: Dajee, hei ass meng Kroun, an hei si meng Gewänner. Dat ass den Zoll fir duerch de Bësch.

Mars: Dat ass den Zoll, an elo därfst dir weider...

Fränz: ... mächtege Kinnek ouni Buerg, ouni Kroun an ouni Gezei.

Michel: Allez, aus de Féiss elei!

Si gi weider.

Pol: Dat war dien zweete Streech, an elo sinn ech midd...

Fränz, Mars, Robert: Mee et war nach net die leschte.

Mars: Michel, elo geet et fir däi Schatz!

Szen 7: Excalibur

Ënnerwee

TRACK 6

Heeschemann: Michel vun Donnerbuerg, bass du eigentlech nach ëmmer e richtege Kinnek?

Michel: Firwat soll ech dann elo op eemol kee richtege Kinnek méi sinn?

Tirlittitti: Ma wëlls du keng Buerg ...

Knupperduller: ... a keng Kroun ...

Hummer: ... kee Gezäi méi hues.

Alicia: Ma hien huet jo nach säi Schatz, seng Leit an och seng Lännereien. Domatt ass hie jo iewer nach ëmmer e mächtig Kinnek.

Buergmadammen: “E mächtige Kinnek”, pah!

Alicia: An ausserdem ass een e Kinnek net duerch déi Saachen déi een huet, mee ...

Buergmadammen: Mee???

Alicia: Wéi soll ech soen?

Buergmadammen: “Wéi soll ech soen”, hihihhi...

Alicia: Ma rutscht mir dach de Bockel erof!

Michel: E Kinnek ass een einfach, dofir brauch ee keng Buerg a keng Kroun a keng Kleeder. E Kinnek ass e Kinnek, an domat basta.

TRACK 7 lues, am Hannergrond

Si komme bei véier Zauberer, et si natierlech déi véier Ritter, déi sech verkleed hunn.

Evtl.: Thiewery C.

Michel: A wie sidd dir dann?

Alicia: Déi komme mir bekannt vir.

Robert: Mir sinn Zauberer vum Grusebierg. Mir sinn aus enger Zäit, déi schonns laang eriwwer ass.

Mars: Mee mir kenne Geheimnisser, déi soss kee kennt.

Michel: Ou, a wéi eng dann.

Pol: Kinnek ouni Kroun, du bass ënnerwee bei d'Quelle vum Sambesi!

Fränz: Wëlls du bei de Baatzekapp, die schrecklechen Draach?!

Michel: Gutt geroden, (*Musik zack aus*) Friemen, dohinner wëll ech tatsächlech, bei d'Quelle vum Sambesi, um Fouss vum Himalaya an hanner der Wüst Negev um Enn vun der Welt.

Robert: Ma dann hues du vill wëlles!

Mars: Wat wëlls du da beim Draach?

Michel: Wat soll ech da schonns beim Draach wëllen? Ech wëll en doud maachen, wëll e bedroht mäi Räich. Nëmme wann ech e Meeschter ginn, kënne mir am Räich vun Donnerbuerg a Rou a Fridde liewen a nëmme da kréien ech meng Buerg, meng Kroun a meng Gewänner erem.

Pol: Ma dann hues du dir will virgeholl.

Fränz: An dat alles ouni Waffen.

Schmad: Ech sinn de Schmad Eisenhammer, an ech hun dem Michel, mengem Kinnek hei dat beschte Schwäert geschmied, dat et ënner dëser Sonn gëtt.

Weist et. De Mars hält him et of.

Mars: Dat beschte Schwäert... ma da kuck emol hei.

De Mars béit d'Schwäert iwwer säi Knéi.

Mars: Wat een Aarmut. Domadder gött däi Kinnek emol kee geckegt Hung Meeschter.

Robert: Hei ass dat richtegt.

Aus engem Fiels stécht e Schwäert.

Robert: Dat ass den Drachendéider Excalibur. Mat diem, a nëmme mat diem, kann ee géint Draache kämpfen.

Michel: Excalibur?! Dat muss ech hunn.

Pol: Lues lues, Kinnek ouni Kroun. Kriss du et aus dem Fiels gezunn?

De Michel probéiert e puermol, mee hie kritt et net eraus.

D'Lidd vum Excalibur

TRACK 8

1 Du paks jo vläicht ee Kilo – dien ass jo guer net schwéier
Di paks jo vläicht een Zënner – mee dat geet guer net séier
Du paks jo vläicht eng Tonn – da bass du stark wéi ee Stéier
Mee eppes paks du sécher net – dat ass den Excalibur
Mee kuck dach hei – en huet guer net bougéiert
Dësen Excalibur – stécht ganz fest am Fiels
Du kriss e just erausgezunn wann s du eis gutt bezills

2 Du paks jo vläicht ee Velo – dien ass jo guer net schwéier
Di paks jo vläicht een Auto – mee dat geet guer net séier
Du paks jo vläicht ee Camion – da bass du stark wéi ee Stéier
Mee eppes paks du sécher net – dat ass den Excalibur
Mee kuck dach hei – en huet guer net bougéiert
Dësen Excalibur – stécht ganz fest am Fiels
Du kriss e just erausgezunn wann s du eis gutt bezills

3 Du paks jo vläicht ee Fliger – dien ass jo guer net schwéier
Di paks jo vläicht een Tanker – mee dat geet guer net séier
Du paks jo vläicht een Héichhaus – da bass du stark wéi ee Stéier
Mee eppes paks du sécher net – dat ass den Excalibur

Mee kuck dach hei – en huet guer net bougéiert
Dësen Excalibur – stécht ganz fest am Fiels
Du kriss e just erausgezunn wann s du eis gutt bezills

Michel: Nee, beim Baart vu mengem Papp, ech packen et net.

Fränz: Da muss du dervir bezuelen. Wien d'Schwäert Excalibur gären hätt, die muss et hei erausgezu kréien, ... oder e muss et bezuelen.

Michel: Da kafen ech et, ech brauch et jo. Wat soll et kaschten, wat ass säi Präis?

Robert: Net deier, net deier... Et kascht dech just ... däi Schatz.

Michel: Mäi Schatz, iewer net die ganzen?

Fränz: Die ganze Ritterschatz, soss kriss du et net.

Michel: Iewer net die ganze, dat ass dach vill ze deier.

Pol: Kee Problem. Du kanns jo mat de bloussen Hänn géint de Baatzekapp untrieden.

Mars: Oder mat dengem Schmad sengem lächerleche Kannersäwel.

All: Allez, Michel, du muss bezulen, soss kënt eis de Baatzekapp huelen.

Michel: Et ass ze deier.

All: Allez, Michel, du muss bezulen, soss kënt eis de Baatzekapp huelen.

Michel: Iewer net die ganze Schatz!

All: Allez, Michel, du muss bezulen, soss kënt eis de Baatzekapp huelen.

Michel: Dajee, dann hei, hei ass mäi Schatz.

De Michel gött d'Suen a kritt direkt d'Schwäert.

Robert: An hei hues du den Excalibur.

Michel: Soll ech och nach merci soen, oder soll ech dir direkt de Kapp erofschloen?!

Si gi weider.

Fränz: A nach eng gutt Reess, an ee schéine Bonjour fir de Batzekapp.

Robert: Kinnek ouni Buerg, ouni Kroun a Kleeder; an elo och nach: Kinnek ouni Ritterschatz.

Mars: Mee mir si nach net fäerdeg mat dir, do kanns du Gëft dropp huelen.

Pol: Dat war dien drëtte Streech, mee ... elo sinn ech midd.

Mars, Robert, Fränz: Et war nach laang net die leschte!

PAUS

Szen 8: Virahnungen

TRACK 9

D'Alicia an de Michel sëtzen alleng ënner dem Schäin vum Mound. All déi aner schlofen.

Alicia: Michel, ech hunn e schlecht Gefill.

Michel: Ech och, Alicia. Ech ka schonns e puer Nuechte net schlofen. Ech dreemen ëmmer esou schlëmm Saachen. Da fäerten ech, Alicia, héiers du?! Da fäerten ech, ech ging den Draach net Meeschter ginn an ech ging mäi ganzt Räich verléieren...

Alicia: Michel, elo hues du bal alles verluer, deng Kinnekskroun, däi Gezäi, däi Schatz an deng Buerg.

Michel: Dat alles brauch ech net fir Kinnek ze sinn. Mee ech fäerten elo de Baatzekapp. Wann ech net staark genuch sinn, dann...

Alicia: Häs du net bësser, déi véier Gestalten ze fäerten...

Michel: Vu wem schwätz du?

Alicia: Déi Zauberer vum Grusebierg, déi Leit aus dem Bësch, si komme mir esou kënnech vir, esou bekannt, esou wéi wann ech se schonn eng Kéier gesinn hätt.

Michel: Du bass duercherneen, Dingerin. Du wees net, wat s du do schwätz.

Alicia: Wann dat esou weidergeet, kënns du guer net bis bei de Baatzekapp...

Michel: Dat wir schéin, mee leider léist sech mäi Rendez-vous mat diem Ongeheier elo net méi ofsoen. Entweder haen ech him de Kapp erof, oder hie frësst mäi Räich.

Alicia: Ech wees net wie méi geféierlech ass, de Baatzekapp, oder déi véier Onbekannter?

Michel: Wat Gespréicher! Wéi kënns du nëmmen op esou Iddien? Ech sinn elo midd, ech muss elo schlofen, soss sinn ech net fit fir de Kampf mam Draach! Gudde Nuecht Alicia, schlof gutt!

Alicia: Elo schléift e schonn. Wann ech dach och nëmme kënt schlofen. Mee meng Gedanke loose mir keng Rou. Ëmmer nees geeschteren déi véier mir duerch de Kapp. Dann die grouse schrecklechen Draach, de Baatzekapp. A wann ech de Michel da ging verléieren. – Papp, mäi Papp, firwat bass du op Jerusalem gaangen? Hei hätt ech dech gebraucht. Mat dir u menger an um Michel senger Säit wir alles méi einfach gewiescht. – Ech muss eppes maachen! Ech kann net hei sëtze bleiwen an drop waarden, datt déi Véier oder den Draach mäi Michel doud maachen. – Ech muss eppes ënnerhuelen, sëtzebleiwe geet net!

D'Alicia steet op a leeft fort.

TRACK 10

Enges Daags am Summer

Jo'ren a Jo're kenne si sech schonn a si hu sech och ganz gär
Mee d'Liewen ass sou haart wéi ee ganz décke Stee, hier Léift steet ënner
kengem gudde Stär

An dobäi kënnt alles sou schéi sinn
Kënnte si dach nëmmen zesumme sinn

Säi Papp ass gefall vru Jerusalem a kënnt ni méi erëm
Hatt ass lo alleng a kräischt ganz vill, mir fannen dat deck schlëmm

An dobäi kënnt alles sou schéi sinn
Kënnte si dach nëmmen zesumme sinn

Mee enges Daags am Summer, komme si vläicht beieneen
Dann ass Schluss mat dësem Spill
Egal wat dir sot, mir glewen dodrunn – si komme bestëmmt beieneen
Wëll dëst Liewe bitt vill ze vill

D'Alicia ass lo fort – hatt ass lo gang – wou ass hatt nëmmen hin
De Michel huet geschlof – hien huet näischt gemierkt – hien huet et net
gesinn

An dobäi kënnt alles sou schéi sinn
Kënnte si dach nëmmen zesumme sinn

D'Alicia hat d'Flemm – hatt wouss net wat man – hat wouss senger Hänn
kee Rot
Lo ass de Michel 'leng – wat soll hien 'lo man – hutt dir iech dat scho gefrot

An dobäi kënnt alles sou schéi sinn
Kënnte si dach nëmmen zesumme sinn

Mee enges Daags am Summer, komme si vläicht beieneen
Dann ass Schluss mat dësem Spill
Egal wat dir sot, mir gleewen dodrunn – si komme bestëmmt beieneen
Wëll dëst Liewe bitt vill ze vill

Szen 9: Panik

Dien anere Mueren

Spillmann: Michel, Kinnek ouni Kroun, deng Dingerin ass fort.

Heeschemann: Hatt huet et sécher mat der Angscht ze doe kritt!

Buergjofferen: Angscht?!?! Huet hatt gefaart?

Michel: Wien ass fort?

Metzler: D'Alicia, deng Dingerin. Einfach verschwonnen, an der däischerer Nuecht!

Buergjofferen: Dat ass schlëmm. Hatt huet gefaart!

Schmad: Dann ass hat dat éischt, wat dech am Stach léist!

Buergjofferen: Dat éischt?

Bauer: Hatt ass dat éischt, mee bestëmmt net dat lescht!

Buergjofferen: Hat ass dat éischt dat dech léist am Stach, mee wie mecht dat selwecht dann elo nach????

Et dauche véier ofgekämpft Persounen op.

All: Halt, Stopp, wie sidd dir?

Schmad: Ma dir gesidd net gutt aus.

Bauer: Ass et iech schlecht ergaangen?

Robert: Omei, frot léiwer net a loosst eis séier laanscht.

Metzler: Séier laanscht, sidd dir presséiert?

Fränz: Presséiert ass guer keen Ausdrock!

Spillmann: Sidd dir op der Flucht, laaft dir engem fort?

Pol: Esou séier wéi d'Féiss eis droe kënnen. An esou wäit si et packen. Wat mir elo erlieft hunn, wëlle mir ni méi erliewen.

Heeschemann: Wiem sidd dir da begéint, dien et esou schrecklech mat iech gemengt huet? Wien ass die schlëmme Patréiner?

Mars: Et ass, et ass, et ass de Baatzekapp den Draach.

All: Den Draach, wat huet dien da mat iech gemaach?

Donnerwieder, am Hannergrond **TRACK 11**

Robert: En huet gelauert a sengem Fiels ...

Mars: ... bis mir nieft him stungen, an dunn ...

Pol: ... an dunn huet hien eis gebass...

Fränz: ... an eis Kleeder zerrass ...

Robert: ... hien huet eis gestouss ...

Mars: ... a gerannt mam Fouss ...

Pol: ... hien huet eis gejuppt ...

Fränz: ... a mat de Käpp widderenee geknuppt ...

Robert: ... hien huet eis geschloen ...

Mars: ... an dat huet wéi geden ...

Pol: ... hien huet eis mat Feier gespaut ...

Fränz: ... a ganz schlëmm Wieder gejaut!

All: De Baatzekapp den Draach, wou ass en?

Ritter: En ass hannel eis, e kënnt eis no, et dauert net méi laang, dann ass en do!

All: Séier, fort vun hei, soss frësst en eis, omeiomei!

Ritter: Kuckt, do huet et an de Blieder gewackelt, do kënnt den Draach ugedackelt. - An do huet et op de Buedem gedonnert, dat ass en, sidd elo net verwonnert. – Alles gëtt däischter an d'Sonn ass net méi do, dat ass de Schied vum Ongeheier elo.

All: Séier, fort vun hei, soss frësst en eis, omeiomei!

All, ausser dem Michel lafen se fort.

Michel: Stopp, bleift dach hei, wou laaft dir hinn. Et ass dach nëmmen en Donnerwieder.

Robert: Ajo, do hues du Recht.

Mars: En Donnerwieder ass net schlecht!

Pol: Da fäerten d'Leit a lafe fort.

Fränz: Esou dreiwen se emol nees Sport.

Michel: Schwätzt net domm, dir, dir, Fäertaschen! Elo sinn ech ganz alleng, d'Alicia huet mech am Stach geloss a meng Leit, meng Ennerdoen sinn och elo fort. Elo hunn ech kee méi, die mir kann hëllefen.

Ritter: Aarme Michel.

Michel: Mee dat ass mir egal! Ech maachen dien Draach iewer kal.

Robert: Dien huet nach ni eng Schluecht geschlo, huet nach ni en Turnéier bestridden, ass nach ni op engem Päerd geridden. Ma dien huet iewer vill wëlles.

Pol: Eise Kinnek ouni Kroun ...

Mars: an ouni Gezäi ...

Fränz: an ouni Buerg ...

Mars: an ouni Schatz ...

Robert: an elo och ouni Leit, ouni Ennerdoen.

Ritter: Aarme Michel!

Pol: Dat war die véierte Streech, mee ... wat sinn ech elo midd!

Mars: Et war nach net die leschten.

Szen 10: Viru Geriicht

Ënnerwee

TRACK 12

De Michel ass alleng

Michel: Een Donnerwieder, a scho si se all fort. Wat Fäerterten...! Ech, die grouse Michel vun Donnerbuerg hunn esou Ennerdoen net néideg, sollen se dach nëmme lafen, wou de Peffer wiist. – An och dat Alicia, déi domm Kou. Léisst mech einfach esou setzen, grad elo wou ech et emol eng Kéier hätt kënne brauchen. Mee nee, hatt mecht sech aus dem Stëbs. Hatt wäert och d’Box voll hunn. Wat een Aarmut, d’Prinzessin Alicia vu Blëtzhausen, d’Meedchen vun diem berühmten Schokobolski, die viru Jerusalem am Kampf mam Saladin gefall ass. Datt ech net laachen! Wann dien grad esou en aarmséilege Huesefouss ass wéi seng Duechter, dann, dann, dann, ... – Soll ech dien Draach alt Meeschter ginn? Ech hu jo iewer den Excalibur, den Draachendéider, mäi Schwäert. - Mee soss hunn ech net méi vill, keng

Buerg, keng Kroun, keng Kleeder, kee Schatz a keng Ennerdoen. – Mee ech hu nach mäi Räich, mäi Land, meng Lännereien!

De Michel kënnt virun een Dësch, un diem véier Riichter setzen.

Robert: Sidd mer gegréist, Friemen.

Michel: Sidd mer och gegréist, Friem!

Ritter: Mir sinn déi véier Riichter vum Draachesteen.

Michel: Ma gudde Moien dann. Vun iech hunn ech iewer nach ni eppes héieren.

Fränz: Da solls du eis elo kënneléieren.

Michel: Ma wat hätt Dir da gäer vu mir?

Pol: Du wëlls mam Draach Baatzekapp kämpfen?

Michel: Jo, dat wëll ech. Meng véier trei Ritter Robert vu Rappdeckel, Fränz vu Fatzbeidel, Pol vu Siweschléifer a Mars vum Panzerbiereg hu mir gesot, datt ech nëmme kënnt mäi Rúaich retten, wann ech den Draach Meeschter ginn.

Mars: Do hu se Recht, déi véier trei Ritter. Mee du wees dach, datt nëmme kënne Kinneken géint esou schrecklech Draachen untrieden.

Michel: Natierlech wees ech dat, ech sinn dach keen domme Jong.

Fränz: A sou! Et ass jo duerchaus méiglech, dass du keen domme Jong bass. Mee bass du dann och ech Kinnek? Nëmme Kinneken kënnen géint d'Draache kämpfen.

Michel: Ma sécher sinn ech e Kinnek. A frot net wéi een! Ech sinn de Kinnek Michel vun Donnerbuerg, de Jong vum grouse Waldemar!

Robert: Esou kann dach jidderee kommen. Mir gesi net, dass du e Kinnek bass. Dat muss du eis schonns beweisen, soss gleewe mir dir et net a mir

kënnen dech net bei den Draachesteen loossen, wou s du kanns mam Baatzekapp kämpfen.

Michel: Elo geet et iewer duer!

Mars: Du muss de Kinnekentest maachen.

Michel: De wat?

Mars: De Kinnekentest. Wann s du die besteest, kanns du bei den Draach.

Michel: Dajee alt, mee maacht virun. Ech muss endlech mäi Räich retten.

Robert: Gutt, da fänke mir un: Fro Nummer eent: Hues du eng Kroun?

Michel: Ech haat eng Kroun, also, wéi soll ech soen, waart, ech muss Iech dat erklären. Ech hat eng Kroun, bis ech ...

Pol: Fro Nummer zwee: Hues du eng Buerg...

Michel: Nee, mee ech hat eng Buerg, fréier, wéi...

Fränz: Fro Nummer dräi: Hues du Kinneksgezei?

Michel: Ech hunn et net méi, mee ech hat es iewer, bis op eemol ...

Mars: Fro Nummer véier: Hues du e Ritterschatz?

Michel: Nee, mee ech hat...

Robert: Fro Nummer fënnef: Hues du Ënnerdoen?

Michel: Nee, ech hu keng Leit...méi.

Ritter: Du konns de Kinnekentest net bestoen a muss elo nees Heem goen.

Michel: Heem? Dat geet net!

Robert: Et sief dann...

Michel: Jo?

Mars: Et sief dann, du bezills!

Michel: Ech bezuelen?

Pol: Du bezills, a mir lossen dech bei den Draach.

Michel: A wat kascht dat dann? Ech hu näischt méi, fir ze bezuelen.

Ritter: Et ass net deier fir an d'Feier vum Ongeheier!

Michel: Wivill? Sot mir wivill?

Robert: Däi Land.

Fränz: Just deng Lännereien.

Pol: Dat ass dach e Klacks fir dech.

Mars: Peanuts! Mir wëlle just däi Räich!

Michel: Just mäi Räich... Gutt, elo sinn ech esou wäit gaangen, elo kënn et och net méi dorop un. Dir kritt mäi Räich an ech kréien de Kampf.

Robert: All däi Land!

Mars: All deng Lännereien!

Michel: Alles!

Pol: Tipptopp an der Rei...

Fränz: Komm séier, ënnerschreif hei!

Robert: An elo: Vorhang op fir déi lescht Ronn!

Mars: De Kinnek ouni Kroun an ouni Land...

Fränz: ... géint de Baatzekapp, die schrecklechen Draach!

De Michel stiirmt no vir.

Pol: An dat war die leschte Streech! Mee elo geet et richtig lass!!!

Szen 11: Showdown

TRACK 13

Schwaarzen Theater...

Et kënnt zu engem schreckleche Kampf zwëschen dem Michel an dem Baatzekapp, an diem déi véier hannerhälteg a niddeträchteg Ritter stiechen.

Wéi den Draach de Michel, die séier gemierkt huet, datt säi Schwäert näischt entdaacht, bal Meschter ginn ass, kommen de Kinnek Schokobolski mat senge Ritter an iwwerwältegen den Draach, also déi véier Ritter. D'Alicia ass och dobäi.

Schokobolski: Ha, elo hu mir iech, dir niddeträchteg an hannerhälteg ... Gauner. Ritter kann ech iech jo net nennen.

All: De Kinnek Schokobolski vu Blätzhausen!!!

***Hei kënnt Dir die ganzen Text gratis
bestellen:
meyerr@gms.lu***